

REGIONAL NEWS BULLETIN
HEADLINES (EVENING)

Date – 30/03/2025

Time - 18:30 Hrs

1. Mizoram sorkarin nikum September thla atanga tuialhthei man chhiah a tih pun atangin vawin February thla thleng khan Road Maintenance cess leh Social Infrastructure & Services cess-ah cheng vaibelchhe 25 chuang a lut tawh
2. Health department hnuaia National Center for Vector Borne Diseases Control (NCVBDC) hotute chuan India ram pumah Mizoram leh Tripura chu Malaria la tam zualna a nih thu an sawi.
3. Prime Minister Narendra Modi-a'n silhfen hluihlawn (textile waste) thehthang chu khawvel tan buaipui tham a ni a ti.
4. Vawiin khan Myanmar-ah lir a nghing leh a, lirnghing vanga thi zat chu 1644 an tling tawh.

<><><>

TAX

Mizoram sorkarin September 2024 atanga tuialhthei man chhiah a tih pun atangin kumin February 2025 thla thleng khan Road Maintenance cess leh Social Infrastructure & Services cess-ah cheng vaibelchhe 25 chuang a lut tawh.

Taxation Department tar lan danin kawng siamna tur Road Maintenance Cess atangin thla Nga kal ta (October 2024 atanga February 2025) inkar khan cheng vbc 12 nuai 86 sing 9 sang 6, 204 hmuh a ni a, vantlang hamthatna hnawthawhna tur Social Infrastructure & Services Cess atangin cheng Vbc 12 nuai 86 sing 9 sang 6, 204 hmuh a ni tawh bawk.

Mizoram sorkar chuan kum hlui April 2024 atanga February 2025 inkar chhung khan GST atangin cheng vbc 856, nuai 18 sing 4 sang 8, 856 a hmu a, Profession Tax atangin cheng vbc 13 nuai 35 sang 4, 925, Sales Tax atangin cheng vbc 166 nuai 35 sing 8, za 2, 79, Entertainment tax atangin cheng sing 6 leh hmun dang atangin cheng nuai 1 sing 2 sang 8, 710 hmuh a ni bawk a. Chhiah chi hrang hrang atanga sum a lakluh hi cheng vbc 1061 nuai 65 sing 1 sang 5, 338 a tling tawh a ni.

<><><>

PHE

Public Health Engineering (PHE) department Engineer-in-Chief Pu H. Duhkima chuan Jal Jeevan Mission hnuaiah Mizorama thingtlang khua zawng zawng tui connection pek tawh ni tawh mah se khaw thenkhat tuia harsatna nei an awm leh tawh thu a sawi.

Akashvani palaiin a kawmnaah he thu hi sawiin Pu H. Duhkima chuan tui in tur pek kawnga sorkar laipui hmalakna pawimawh Jal Jeevan Mission hnuaiah thingtlang khaw 728-ah tui connection pek vek an nih tawh thu a sawi a. Hetah hian khaw sipera ngaih zawng zawng pawh an ni chuan khua anga chhiarin an telh vek thu a sawi a. Jal Jeevan Mission programme hnuaiah tui connection pechhuak vek tawh a an inngaih laiin a mission tawp hnu kum 1 em pawh la ni loah khaw 66 in tui hna tlem avangin tui laknaah harsatna an tawh leh tawh a ti.

PHE Engineer in Chief Pu H. Duhkima chuan khawpui lamah pawh an chhinchhiah danin Mizorama khawpui 28-ah khawpui 17, a zatve aia tam daih chu an dawn tur ang la dawng lo, tui khawpkham lo an la nih thu a sawi a. Khawpui bakah thingtlang hmun tam takah chuan an khua aia sanga an kham khawp tui lakna tur tui hna a awm tawh loh avangin ruam atanga pump a ni tlangpui tawh niin a sawi a. Khawpui lianah phei chuan pump-ah a inngat ber tih sawiin eng ang pawhin khawl tha leh hmanraw tha awm mah se tui hna ber a that loh chuan awmzia a awm loh thu a sawi a ni.

Pu H. Duhkima chuan ramngaw tih chereu avangin Mizorama tui hnain a tuar nasa a, tui khamkhawp hmu thei lo khua an tam phah hle a ni a ti a. Ruahtui dawhthleng tha tak chu ram ngaw a nih thu sawiin ram ngaw tha tak siam a pawimawh thu a sawi a,

fur laia inchunga tui luanliam tir mai mai, tui dah khawl ngaipawimawh lo an tam tih a sawi a. Thal a lo thlenin sorkar an dem leh mai thin a ti a. Nunna atana pawimawh tak tui dahkhawl na tur tuizem lei tul ti lo an tam chu pawl a tih thu a sawi a. Tui dahkhawl uar zel turin mipuite a sawm a ni.

<><><>

ASF

Mizoramah tun hnaia vawh pul hri African Swine Fever (ASF) hmuhchhuah leh a nih hnuah kumin chhungin vawiin thleng khan vawh 509 a thi tawh a, vawiinah 6 thih belh lehin, ASF kai nia rinhlelh vawh 94 suat belh a ni leh tawh bawh.

Vawh pul hri hi Mamit leh Lawngtlai Dist ah a leng leh mek a, AH & Vety Dept atanga thudawn danin, heng district-a vawh thi te sample hi Aizawla test anih hnuah a nemngheh nan Guwahati-a a endikna hmunpuiah thawn a ni a, result ah ASF a ni tih finfiah a ni.

Tuna record thar berah chuan Mamit Dist Zawlnuamah vawh 69 an thi tawh a, vawh 10 suat a ni tawh bawh a, Lawngtlai District chhungah hluar berin vawiin thleng khan ASF avanga vawh thi 440 report a ni a, vawh 84 suat a ni tawh bawh.

ASF vawh pulhri leng hi nikum tawp lam thlasik a intan atang khan a ziaawm chho va. December thla tawp lamah kha chuan ni khata vawh thi leh vawh suat awm loh ni a awm chho zel a. Vety department hotute chuan khaw lum chho leh ruahtui tlem azawng tla avangin vawh pul hri hi a tam chho leh nghal mai a ni an ti.

<><><>

MALARIA ELIMINATION

Health department hnuaia National Center for Vector Borne Diseases Control (NCVBDC) hotute chuan India ram pumah Mizoram leh Tripura chu Malaria la tam zualna a nih thu an sawi.

Akashvani in a kawmnaah department hotute chuan he thu hi sawiin Mizoram leh Tripura tih loh India ram state dangteah chuan malaria chu an thunun hneh viau tawh thu an sawi a. Mizoram chhungah pawh malaria chu a ziaawm tawh hle thu sawiin hetihual hian Mamit, Lunglei, Lawngtlai leh Siaha district te tuna malaria awm tam zualna a la nih thu an sawi a. Heng district-ah te hian a la tam deuh avangin Mizoram dinhmun pawh a la chhiat phah rih thu an sawi a. District dang zawng zawngah chuan malaria tihbo kawnga sorkar laipuiin a rawn beisei ang an phak thuak tawh thu an sawi a ni.

NCVBDC hotute chuan malaria chu India ram kum 1950 chho atangin a lo do tawh tih sawiin malaria umbo tuma hmalakna chu a upa tawh hle tih an sawi a. Sorkar laipui chuan kum 5 te te in malaria umbo hna a kalpui thin tih sawiin kum 5 zel tih chu a tawh ta lo tih a hriat hnuah sorkar chuan kum 2016 atangin kum 15 daih malaria tibo tura beihpuithlakna tur, National Framework for Malaria Elimination a siamchhuak tih an sawi a. Kum 15 chhunga mar taka tanga malaria um bo ngei ngei turin an rawn beisei thu an sawi a. NCVBDC hotute chuan malaria chu Mizoram hmai balhna a nih theih dawn avangin tan lak nasat a ngaih thu an sawi a. Mipuite chu a thawktute ziritirna ngaipawimawh tur leh an thil sem damdawi hrang hrang te thuawih taka mithiamin a hun bi an sawi anga ei thin turin an chah a ni.

<><><>

FIMKHUR THLA

Central YMA chuan Furpui lo thlen hmaa khuarel chhiattawh laka lo inralrinna atan April thla hi 'Fimkhur Thla'-ah puangin, Sub-Hqrs., Group leh Branch YMA te hnenah puangzara bawhzui tur hriattirna a chhuah.

Mahni veng leh khaw hrang hrangah YMA chuan mahni huamchhuangah inhmun leh lei lai ten Furpui lo thlen hma lei laih te nghet taka lungrem/Concrete a tih ngheh hman ni se, thal chhungin mitinin tuidawn leh tui paihna mumal taka siam a, tui chhe paihna te kawrpuih tha taka luan luh tir a, furpui lo thlen hmain a tul anga mahni chenna in lo thuam tha lawk turin mipui te a chah a ni.

Central YMA chuan khaw tin leh veng tinin mahni huam chhunga lui leh kawr-te hnawhtu a awm leh awm loh leh a him tawh em tih en fel vek ni se an ti a. A him tawh lova hriatte chu then fai ngei ni se, a tul dan azirin YMA hnatlang pawh koha tih that

vek ni bawk se an ti a. Mahni huam chhunga thing zar leh thingzar ro tlak leh tluk hlauhawm te Forest Dept. hriattir emaw, kih fai ni se an ti a. Kham/Kawngko sanga lung tla leh lei min mai thei a awm leh awm loh en fela, hlauhawm a awm chuan hma lak nghal ni se a ti bawk.

Lei tlahniam hlun leh min thinna hmun te chhiatna nasa zawk thleng thei turte uluk taka en fel a, a tul anga invenna siam ni se an ti a, thlanmual a him em tih uluk taka en fel a, a tul anga thlan chung pawh tui lut theilo tura Cement a zut phui vek turin CYMA chuan an thuchhuahah an tarlang a, Branch YMA te 'Fimkhurna Thla' an hman dan Central YMA-a thehlut leh turin an chah bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

PM ‘MANN KI BAAT’

Prime Minister Narendra Modi-a chuan silhfen hlui (textile waste) thehthang hi khawvel pum tan buaipui tham a ni ta a ti.

Vawiina Akashvani Mann Ki Baat programmme-a thuchah a sawiah Prime Minister chuan silhfen hluihlawn za-a pakhat pawh tling mang lo chauh chu thawmhnaw dang siam lehna atan hman a ni a ti a. India chu silhfen hluihlawn thehthang tam lamah khawvela 3-na a ni a ti.

Silfen hlui hlamchhiah a, a thar lei zel hi kan intihhmuh tual tual a. Hei hian silhfen hluihlawn a tipung zel tih Prime Minister chuan a sawi a. Hemi sutkianna tur hian India pawhin theihtawp chhuaha hma a. Kawr leh pheikhawk hluite chu chei that a, a mamawhte hnenah sem a ni a ti a. Silfen hluihlawn hmanga thil tha dang tam tak a siam theih thu a sawi.

Prime Minister chuan nipui a lo thawk tan phat atangin khawpui leh thingtlang hmun tam takah ruahtui khawl tura inbuatsaih thin a nih thu a sawi a. Ruah tui khawl khawm kawngah leh tui remchem kawngah hian state tam takin hma an sawn tawh hle a ni a ti.

Jal Shakti Ministry leh tlawmngai pawlte hmalaknain hmun tam takah tuikhur hiah a ni a, tui khuah a ni a, tuichhunchhuah siam a ni a, tuichhe paihna khurte siam a ni a ti. Kumtin ruah tui khawl khawm tura infuihna ‘Catch The Rain’ kalpui a nih thu Prime Minister hian a sawi bawk a ni.

<><><>

ANOTHER 5.1-MAGNITUDE EARTHQUAKE HITS MYANMAR AS DEATH TOLL FROM DEVASTATING QUAKE TOPS 1,600

Vawiin khan lirnghing tehna magnitude 5.1-a nain Myanmar khawpui lian ber dawttu Mandalay kiangah lir a nghing leh a, Zirtawp ni-a magnitude 7.7-a lir a nghin hnu-a Myanmar-a lirnghing tharlam ber a ni rih.

Hriat theih chinah Myanmar lirnghing avanga thi zat chu 1644 an tling tawh a. Mi 3,408 an hliam a, midang 139 chin hriat lohvin an la bo bawk a ni.

Puan tawh angin Zirtawp ni khan lirnghing, a tehnaa magnitude 7.7-a na chuan Mandalay chheh vel a sawi a, chenna in thahnem tak a tihchhiat bakah, lamlian leh lei bakah hmasawna ruhrel engngemaw zat a tichhia a ni.

<><><>